

ԿԱՐԵՆ ՀԱՍԼԵՏԻ ԽԱՉԱՏՐՅԱՆ  
(Ծննդյան 50-ամյակի առթիվ)\*

Լրացավ ճանաչված պատմաբան, գիտության և կրթության փորձառու կազմակերպիչ, ՀՀ ԳԱԱ պատմության ինստիտուտի գիտա-

կան հարցերի գծով փոխտնօրեն, պատմական գիտությունների դոկտոր, պրոֆեսոր Կարեն Համլետի Խաչատրյանի ծննդյան 50-ամյա և գիտական գործունեության 25-ամյա հոբելյանները:

Կ. Խաչատրյանը ծնվել է 1969 թ. մայիսի 25-ին, Երևանում: Միջնակարգ դպրոցն ավարտելուց հետո՝ 1986 թ., միութենական նպատակային մրցույթով ընդունվել է Բելառուսական պետական համալսարանի պատմության ֆակուլտետում:

1987–1989 թթ. Կ. Խաչատրյանը ծառայել է Խորհրդային բանակում: Զորացրվելուց հետո՝ 1989 թ., ուսումը շարունակել է Երևանի պետական համալսարանի պատմության ֆակուլտետում, որն ավարտել է

1993 թ.:

1994 թ. Կ. Խաչատրյանի գործունեությունը սերտորեն կապված է ՀՀ ԳԱԱ պատմության ինստիտուտի հետ, որտեղ նա ձևակերպվել է հայցորդ, իսկ 1995 թ. փետրվարի 1-ից հրամանադրվել աշխատանքի որպես ավագ լաբորանտ: 1998 թ. Կ. Խաչատրյանը պաշտպանել է թեկնածուական («ՀՍԽՀ և ՌՍՖԽՀ փոխհարաբերությունները 1920–1922 թթ.», գիտական ղեկավար՝ ՀՀ ԳԱԱ ակադեմիկոս Հրանտ Ավետիսյան), 2015 թ.՝ դոկտորական ատենախոսություն («Հայաստանը ԽՍՀՄ ռազմաարդյունաբերական համալիրի համակարգում (1922–1991 թթ.)»), 2006 թ. ստացել է դոցենտի, 2017 թ.՝ պրոֆեսորի գիտական կոչում: 1999–2008 թթ. նա զբաղեցրել է ինստիտուտի գիտական քարտուղարի պաշտոնը, 2008 թ. ինստիտուտի գիտական հարցերի գծով փոխտնօրենն է, առաջատար գիտաշխատող: 2016 թ. համատեղությամբ վարում է նաև ինստիտուտի նորաստեղծ Ընդհանուր պատմության բաժնի վարիչի պաշտոնը: Կ. Խաչատրյանը երկար տարիներ Պատմության ինստիտուտի գիտական, ինչպես նաև ինստիտուտում գործող ՀՀ ԲՈԿ-ի 004 «Հայոց պատմություն» մասնագիտական խորհուրդների անդամ է (2003–2005 և 2009–2011 թթ. եղել է խորհրդի գիտական քարտուղարը):

\* Ընդունվել է տպագրության 13. III. 2019 թ.:

Կ. Խաչատրյանը գիտակազմակերպչական գործունեությունն արդյունավետ գուգակցում է գիտամանկավարժական աշխատանքի հետ. 2003–2009 թթ. վարել է Երևանի «Հրաչյա Աճառյան» համալսարանի Միջազգային հարաբերությունների ֆակուլտետի դեկանի պաշտոնը, իսկ 2009 թ. մինչև օրս ԳԱԱ գիտակրթական միջազգային կենտրոնի մագիստրատուրայի Պատմության և միջազգային հարաբերությունների ամբիոնի վարիչն է: 2014 թ. Կ. Խաչատրյանը դասավանդում է նաև Երևանի պետական համալսարանի պատմության ֆակուլտետում: Նրա գիտական ղեկավարությամբ կատարվել են բազմաթիվ ավարտական և մագիստրոսական աշխատանքներ, Երկու ասպիրանտ (Համո Սուքիասյան, Գագիկ Ժամանակային) հաջողությամբ պաշտպանել են թեկնածուական ատենախոսություններ:

Կ. Խաչատրյանի գիտական հետաքրքրությունների շրջանակում են Հայաստանի նոր և նորագույն ժամանակաշրջանի պատմության տարաբնույթ հիմնախնդիրները՝ Հայկական հարց և Հայոց ցեղասպանություն, Հայուսական հարաբերություններ, Հայաստանի առաջին, երկրորդ (խորհրդային) հանրապետությունների, ԼՂԻՄ-ի պատմություն և այլն: Նա հեղինակ է չորս մենագրության, 50-ից ավելի գիտական հոդվածների, որոնք հրատարակվել են ինչպես Հայաստանի Հանրապետության առաջատար հայագիտական ամսագրերում («Պատմաբանասիրական հանդես», «Լրաբեր հասարակական գիտությունների», «Վէմ», «Բանբեր Հայաստանի արխիվների» և այլն), այնպես էլ արտասահմանյան հեղինակավոր պարբերականներում («Новая и новейшая история», «Историческое пространство. Проблемы истории стран СНГ» և այլն):

Ճանաչված պատմաբանի անդրանիկ մենագրությունը նվիրված է 1985–1991 թթ. ԽՍՀՄ մինիստրների խորհրդի նախագահ, Հայաստանի ազգային հերոս Նիկոլայ Ռիմկովի գործունեությանը («Великий друг армянского народа – Н. И. Рыжков», Ереван, 2004): Աշխատություննում վեր է հանված ն. Ռիմկովի ունեցած ծանրակշիռ ներդրումը 1988 թ. Սպիտակի երկրաշարժի հետևանքների վերացման գործում:

Կ. Խաչատրյանի «Հայուսական հարաբերությունները 1920–1922 թթ.» մենագրությունը (Երևան, 2007) թեկնածուական ատենախոսության վերամշակված և լրացված տարբերակն է: Այստեղ արխիվային բազմաբնույթ փաստաթղթերի, մամուլի հրապարակումների, թեմային առնչվող պատմագիտական գրականության լայն հենքի վրա խորությամբ ուսումնասիրվել ու նորովի լուսաբանվել են Հայաստանի խորհրդայնացման, Խորհրդային Հայաստանի և Ռուսաստանի ուազմաքաղաքական, սոցիալ-տնտեսական հարաբերությունների պատմության բազմաթիվ հիմնախնդիրներ: Դրանք ներկայացվում են տարածաշրջանի, Հայաստանի և Ռուսաստանի 1920–1922 թթ. պատմության համապատկերի վրա:

Նա հեղինակ է նաև «Խորհրդային Հայաստանի և ԼՂԻՄ-ի տարածքային կորուստները 1920–1930-ական թվականներին» (Երևան, 2015) ուսումնասիրության (Համահեղինակներ՝ Համո Սուքիասյան, Գեղամ

Բաղալյան), որտեղ փաստական հարուստ հիմքի վրա ամբողջական լուսաբանված է 1920–1930-ական թվականներին Խորհրդային Հայաստանի և ԼՂԻՄ-ի տարածքային կորուստները։ Աշխատանքը պատկերացում է տալիս Հայաստանի ներկա սահմանների ձևավորման ընթացքի մասին։ Նշալ հետազոտությունը կատարվել է ՀՀ ԿԳՆ գիտության կոմիտեի ֆինանսավորմամբ։

Կ. Խաչատրյանի երկարատև գիտական աշխատանքի արդյունք է «Հայաստանը ԽՍՀՄ ռազմաարդյունաբերական համալիրի համակարգում (1922–1991 թթ.)» (Երևան, 2015) արժեքավոր մենագրությունը։ Նրանում հեղինակը հայ պատմագիտության մեջ առաջին անգամ ԽՍՀՄ ռազմաարդյունաբերական համալիրի (ՌԱՀ) ստեղծման ու փուլային զարգացման պատմության ընդհանուր համատեքստում բացահայտում է Խորհրդային Հայաստանի արդյունաբերության և գիտության բացառիկ ներդրումը ԽՍՀՄ ՌԱՀ-ում խորհրդային գրեթե ամբողջ ժամանակաշրջանում։

Գիտնականը կազմել և հրատարակել է փաստաթղթերի ու նյութերի երեք ժողովածու։ «Из истории армяно-украинских, венгерских и молдавских отношений» հոդվածների և փաստաթղթերի ժողովածու (Համակազմող՝ Հովհաննես Ալեքսանյան) (Երևան, 2012) հրատարակված նյութերը լույս են սփռում այդ կապերի ձևավորման և զարգացման պատմության վրա։ Նրա առաջաբանով հրատարակված փաստաթղթերի հաջորդ ժողովածուները նվիրված են արցախյան հիմնախնդրին (Համակազմող՝ Հրանտ Աբրահամյան)։ «Հայության պայքարը ԼՂԻՄ-ը Խորհրդային Հայաստանի հետ միավորելու համար (1923–1988)» (Երևան, 2011) և «Հայության կոչերն ու դիմումները ԼՂԻՄ-ը Խորհրդային Հայաստանի հետ միավորելու համար (1988–1989)» (Երևան, 2014) փաստաթղթերի և նյութերի ժողովածուներում տպագրված վավերագրերում հիմնավորում է, որ Խորհրդային ժամանակաշրջանում համայն հայությունը՝ թե՛ Խորհրդային Հայաստանում և ԼՂԻՄ-ում, և թե՛ Սփյուռքում, պայքարել է Լեռնային Հարաբերը Խորհրդային Հայաստանին միավորելու համար։

2018 թ. Պատմության ինստիտուտի 75-ամյա հոբելյանի առթիվ Կ. Խաչատրյանի խմբագրությամբ լույս տեսավ «Պատմության ինստիտուտ՝ 75» արժեքավոր գիրքը (կազմողներ՝ Կ. Խաչատրյան, Հակոբ Մուրադյան, Հ. Սուքիասյան), որտեղ ի մի է բերված ինստիտուտի գիտական, գիտակազմակերպչական և գիտակրթական գործունեությունը։ Ներկայացված է ինստիտուտի անցած ուղին, բաժնների կատարած աշխատանքները և այլն։

Պատմաբանը գործուն մասնակցություն է ունեցել Պատմության ինստիտուտի կողմից հրատարակվող «Հայոց պատմության» ակադեմիական նոր բազմահատորյակի չորրորդ հատորի (1918–1991 թթ.) երկու գրքերի պատրաստմանը, հատորի պատասխանատու խմբագրի տեղակալն է։ Մասնակցել է նաև «Հայոց պատմության» դպրոցական դասագրքերի ստեղծմանը։ Նրա ուշագրության կենտրոնում է եղել նաև ինստիտուտի «Հայոց պատմության հարցեր» տարեգիրքը, որի խմբագրական խորհրդի նախագահի տեղակալն է։

Կ. Խաչատրյանը կարևոր ներդրում ունի Հայաստանի Հանրապետությունում առօրեականության պատմության թեմայով հետազոտությունների սկզբնավորման հարցում։ Այս թեմատիկայով նրա ղեկավարած դրամաշնորհային թեմաների (կատարողներ՝ Գ. Ժամանակակից արքան, Հ. Սուքիասյան, Գայանե Ղազարյան) կատարման ընթացքում պատմագիտական ավանդական և ժամանակակից մոտեցումների ու մեթոդների զուգորդմամբ՝ կատարված հետազոտությունների արդյունքում միանգամայն այլ՝ հասարակ անհատի տեսանկյունից ուսումնասիրվել և ուսումնասիրվում է Խորհրդային Հայաստանի 1920–1930-ական և 1940–1960-ական թվականների պատմության ներկայումս վերջնական արժեկորում չստացած, երբեմն էլ միայն զգացական, միակողմանի գնահատականների արժանացող բազմաթիվ իրողություններ։

Կ. Խաչատրյանը գիտական զեկուցումներով, դասախոսություններով և ելույթներով հանդես է եկել հանրապետական ու միջազգային (Ռուսաստան, Բելառուս, Վրաստան, Ուկրաինա, Մոլդովա, Ղրղզստան, Իրան, Եգիպտոս, Լիբանան և այլն) տասնյակ գիտաժողովներում և գիտագործնական սեմինարներում, Սփյուռքի հայկական համայնքներում։

Պրոֆ. Խաչատրյանը հետխորհրդային տարածքում ճանաչված և հեղինակություն վայելող պատմաբան է։ Նա ղեկավարել է Պատմության ինստիտուտի պատվիրակությունը և տարիներ շարունակ հանդես եկել դասախոսություններով ԱՊՀ պատմության ինստիտուտների միջազգային ասոցիացիայի ներքո կազմակերպվող երիտասարդ պատմաբանների ամառային դպրոցներում։

Գիտամանկավարժականից զատ՝ Կ. Խաչատրյանն իրականացրել և իրականացնում է նաև հանրային-հասարակական գործունեություն։ Իրեն պատմաբան-խմբագիր մասնակցել է Հայաստանի հանրային հեռուստաբնկերության «Ինչու է աղմկում անցյալը» խորագրով շուրջ 40 պատմավերագրական արժեքավոր ֆիլմերի ստեղծմանը (Հեղինակ՝ Մանուկ Մուրադյան)։ Հայաստանի գիտության ու մշակույթի ճանաչված ներկայացուցիչների հետ «Պատմության և մշակույթի էջեր» ծրագրի շրջանակներում դասախոսություններով հանդես է եկել ՀՀ զինված ուժերի և Արցախի Հանրապետության (ԱՀ) պաշտպանության բանակի տարրեր զորամասերում, որի համար արժանացել է ՀՀ պաշտպանության նախարարության պատվողը, իսկ 2018 թ. ԱՀ նախագահ Բ. Սահակյանի հրամանագրով պարգևատրվել է «Երախտագիտության» մեդալով։ Կ. Խաչատրյանը պարգևատրվել է նաև ՀՀ ԳԱԱ գովեստագրով, Պատմության ինստիտուտի վաստակագրով, ՀՀ Սփյուռքի նախարարության պատվողրով և այլն։

Շնորհավորելով մեր գործընկերոջը՝ մաղթում ենք նրան նորանոր ձեռքբերումներ գիտական և գիտակրթական ասպարեզներում, նոր ուսումնասիրություններ, որոնք, վստահաբար, կհամարեն հայկական պատմագիտության արժեքավոր հրատարակությունների շարքը։

Աշոտ Մելքոնյան  
Համբ Սուքիասյան